

ԿԱՆՈՆԱԿԱՐԳ

ԵՐԵՎԱՆ ՔԱՂԱՔԻ ԱՎԱԳԱՆՈՒ ՄՇԱԿՈՒՅԹԻ, ԿՐԹՈՒԹՅԱՆ ԵՎ ՍՈՑԻԱԼԱԿԱՆ ՀԱՐՑԵՐԻ ՄՇՏԱԿԱՆ ՀԱՆՁՆԱԺՈՂՈՎԻ

I. ԸՆԴՀԱՆՈՒՐ ԴՐՈՒՅԹՆԵՐ

1. Երևան քաղաքի ավագանու «Մշակույթի, կրթության եւ սոցիալական հարցերի» մշտական հանձնաժողովի (այսուհետ՝ Հանձնաժողով) կանոնակարգը մշակված է «Երևան քաղաքում տեղական ինքնակառավարման մասին» օրենքի (այսուհետ՝ Օրենք) և Երևան քաղաքի ավագանու (այսուհետ՝ Ավագանի) կանոնակարգի (այսուհետ՝ Կանոնակարգ) պահանջների համաձայն:

2. Սույն կանոնակարգով սահմանվում է Հանձնաժողովի գործունեության նպատակը կազմավորման կարգը, խնդիրները, լիազորությունները, աշխատանքների կազմակերպման ընթացակարգը, կազմը և նրանց իրավասությունները:

3. Հանձնաժողովը ստեղծվել է Ավագանու որոշումների նախագծերի և Կանոնակարգով իրեն վերապահված հարցերի նախնական քննարկման և դրանց վերաբերյալ Ավագանուն եզրակացություններ տալու, ինչպես նաև Ավագանու անունից վերահսկողություն իրականացնելու նպատակով:

4. Հանձնաժողովի կազմը ձևավորվում է Ավագանու անդամներից և հաստատվում Երևանի քաղաքապետի որոշմամբ:

Հանձնաժողովն ունի հետևյալ կազմը.

- 1) Հանձնաժողովի նախագահ,
- 2) Հանձնաժողովի նախագահի տեղակալ,
- 3) Հանձնաժողովի անդամներ:

5. Հանձնաժողովի նախագահը և տեղակալը ընտրվում են Ավագանու նիստում՝ Օրենքով և Կանոնակարգով սահմանված կարգով:

6. Հանձնաժողովը կազմավորված է Կանոնակարգով սահմանված կարգով՝ խմբակցություններին հատկացված տեղերի թվաքանակին համապատասխան:

7. Հանձնաժողովին անդամակցելու, անդամների փոփոխության հարցերը լուծում է համապատասխան խմբակցությունը:

8. Հանձնաժողովը Ավագանու մարմին է և իր գործունեությունն իրականացնում է Հայաստանի Հանրապետության Սահմանադրության, «Երևան քաղաքում տեղական ինքնակառավարման մասին» օրենքի, այլ օրենքների և իրավական ակտերի, Երևան քաղաքի ավագանու կանոնակարգի, սույն կանոնակարգի պահանջներին համապատասխան:

II. ՀԱՆՁՆԱԺՈՂՈՎԻ ԽՆԴԻՐՆԵՐԸ

9. Հանրաժողովի խնդիրներն են՝

1. նախապատասխանել Հանձնաժողովի իրավասության մեջ մտնող հարցեր՝ Ավագանու նիստում քննարկման ներկայացնելու համար.
2. աջակցել Ավագանու գործունեությանը հետևյալ ոլորտներում,
 - ա) մշակույթ,
 - բ) կրթություն,
 - գ) զբոսաշրջություն,
 - դ) երիտասարդություն,
 - ե) սպորտ,
 - զ) առողջապահություն,
 - է) սոցիալական ապահովություն,
 - ը) մայրություն եւ մանկություն,
 - թ) հաշմանդամություն,
 - ժ) աշխատանք,ժա) զբաղվածություն,
ժբ) հասարակայնություն եւ արտաքին կապեր:

III. ՀԱՆՁՆԱԺՈՂՈՎԻ ԼԻԱԶՈՐՈՒԹՅՈՒՆՆԵՐԸ

10. Հանձնաժողովի լիազորություններն են՝

իրեն վերապահված հարցերի շրջանակում.

1. ուսումնասիրել Ավագանու նիստերին ներկայացվող նախաձեռնություններն ու առաջարկությունները, դրանց վերաբերյալ տալ կարծիքներ ու եզրակացություններ,
2. վերահսկողություն իրականացնել.
 - ա. Ավագանու, ինչպես նաև Հանձնաժողովի որոշումների կատարման նկատմամբ,
 - բ. Երևանի քաղաքապետի որոշումների կատարման նկատմամբ:

11. Հանձնաժողովի որոշմամբ կամ Հանձնաժողովի անդամների ընդհանուր թվի առնվազն մեկ երրորդի պահանջով քաղաքապետից, քաղաքապետարանի աշխատակազմի քարտուղարից վարչական շրջանների ղեկավարներից, Երևանի ենթակայության կազմակերպություններից ստանալ անհրաժեշտ փաստաթղթեր և տեղեկատվություն:

12. Հանձնաժողովն իր կազմից կարող է ձևավորել աշխատանքային խումբ (խմբեր):

IV ՀԱՆՁՆԱԺՈՂՈՎԻ ԱՇԽԱՏԱՆՔՆԵՐԻ ԿԱԶՄԱԿԵՐՊՈՒՄԸ

13. Հանձնաժողովն իր աշխատանքները կազմակերպում է նիստերի միջոցով, որոնք գումարվում և անց են կացվում Երևանի ավագանու և սույն կանոնակարգին համապատասխան:

14. Հանձնաժողովի նիստն իրավագոր է, եթե նիստին ներկա են Հանձնաժողովի անդամների ընդհանուր թվի առնվազն մեկ քառորդը:

15. Հանձնաժողովի հերթական նիստերը հրավիրվում են ամիսը առնվազն մեկ անգամ Հանձնաժողովի որոշմամբ սահմանված օրը և ժամին:

16. Երևանի ավագանու նիստի ընթացքում արգելվում է Հանձնաժողովի նիստի հրավիրումը:

17. Հանձնաժողովի նիստերը տեղի են ունենում Երևանի ավագանու նստավայրում: Այլ վայրում հանձնաժողովի նիստ կարող է անցկացվել միայն Հանձնաժողովի որոշմամբ, որի մասին Հանձնաժողովի նախագահը նախապես տեղեկացնում է Երևանի քաղաքապետին:

18. Հանձնաժողովի նիստերը դռնբաց են: Հանձնաժողովի նիստերին խորհրդակցական ձայնի իրավունքով կարող են մասնակցել նաև քաղաքապետը, քաղաքապետի առաջին տեղակալը, ավագանու անդամները և ներկայացնել առաջարկություններ քննարկվող հարցի վերաբերյալ: Հանձնաժողովի նիստին կարող է մասնակցել նաև նախաձեռնության հեղինակ՝ ավագանու անդամը(ները):

19. Հանձնաժողովն իր նիստին կարող է հրավիրել քննարկվող հարցին առնչվող Երևանի քաղաքապետարանի աշխատակազմի ստորաբաժանումների ղեկավարներին, Երևանի ենթակայության կազմակերպությունների ղեկավարներին, ինչպես նաև Երևանի քաղաքապետարանի աշխատակազմի քարտուղարին՝ իր անդամների ընդհանուր թվի ձայների մեծամասնությամբ:

20. Հանձնաժողովի արտահերթ նիստ հրավիրվում է հրատապ քննարկում պահանջող հարցերի առկայության դեպքում:

21. Հանձնաժողովի արտահերթ նիստ հրավիրվում է Հանձնաժողովի նախագահի կամ անդամների առնվազն մեկ երրորդի նախաձեռնությամբ՝ նախաձեռնողի սահմանած ժամկետում և օրակարգով:

22. Հանձնաժողովի նախագահը Հանձնաժողովի անդամներին իրազեկում է նիստի հրավիրման ժամկետից՝ առնվազն 3 օր առաջ:

23. Հանձնաժողովի արտահերթ նիստի օրակարգը, նրանում ընդգրկված հարցերի, որոշման նախագծի փաթեթները Հանձնաժողովի նախագահը Հանձնաժողովի անդամներին տրամադրում է արտահերթ նիստը նախաձեռնելուց հետո ոչ ուշ, քան 24 ժամվա ընթացքում:

24. Հանձնաժողովի անդամը, նիստին ներկայանալու անհնարինության դեպքում, այդ մասին նախապես տեղեկացնում է Հանձնաժողովի նախագահին:

25. Հանձնաժողովի նիստը վարում է Հանձնաժողովի նախագահը, իսկ նրա բացակայության դեպքում՝ նախագահի տեղակալը: Հանձնաժողովի նախագահի և տեղակալի բացակայության դեպքում, Հանձնաժողովի որոշմամբ՝ նիստը վարում է Հանձնաժողովի անդամներից մեկը:

26. Արտահերթ նիստի օրակարգը ներկայացնում է հանձնաժողովի նախագահը և նիստը վարում սույն կանոնակարգի 29 կետի 1), 2), 3), 4), 5), 6) ենթակետերի համաձայն:

27. Հանձնաժողովի նիստն իրավագոր է, եթե նիստին մասնակցում են Հանձնաժողովի անդամների ընդհանուր թվի առնվազն մեկ քառորդը:

28. Հանձնաժողովի հերթական նիստը սկսվում է օրակարգի հաստատումով, մինչև օրակարգի հաստատումը այլ հարցեր չեն քննարկվում:

29. Հանձնաժողովի հերթական նիստի օրակարգի հաստատումից հետո հարցերը քննարկվում են հետևյալ հաջորդականությամբ.

- 1) Հանձնաժողովի նիստը վարողը ըստ օրակարգի ներկայացնում է քննարկվող հարցը և դրա վերաբերյալ հիմնական ու հարակից զեկուցողներին,
- 2) հիմնական զեկուցողի ելույթը,
- 3) հարցեր հիմնական զեկուցողին,
- 4) հարակից զեկուցողի ելույթը,
- 5) հարցեր հարակից զեկուցողին,
- 6) մտքերի փոխանակություն,
- 7) նիստը վարողի եզրափակիչ ելույթը,

8) քվեարկություն:

30. Հանձնաժողովի նիստում յուրաքանչյուր հարցի վերաբերյալ քվեարկությունը կատարվում է առանձին՝ այդ հարցի քննարկման ավարտից անմիջապես հետո:
31. Քվեարկության է դրվում քննարկված հարցի վերաբերյալ կարծիք կամ Ավագանուն դրական եզրակացություն ներկայացնելու մասին առաջարկությունը: Եթե քվեարկության արդյունքում առաջարկությունը չի ընդունվում, ապա համարվում է, որ հարցի վերաբերյալ Հանձնաժողովը դրական կարծիք կամ եզրակացություն չի ներկայացրել:
32. Հանձնաժողովի որոշումներն ընդունվում են, եթե որոշմանը կողմ են քվեարկել Հանձնաժողովի նիստին ներկա անդամների մեծամասնությունը, բայց ոչ պակաս քան մեկ քառորդը: Ձայների հավասարության դեպքում նիստը վարողի ձայնը վճռորոշ է: Հանձնաժողովի նիստերի որոշումներն ընդունվում են բաց քվեարկությամբ:
33. Հանձնաժողովի նիստերն արձանագրվում են և ձայնագրվում: Նիստի արձանագրությունը, որը ներառում է նաև Հանձնաժողովի նիստում քննարկված բոլոր հարցերի քվեարկությունների արդյունքներն ու Հանձնաժողովի եզրակացությունը՝ ստորագրում է Հանձնաժողովի նախագահը:
34. Հանձնաժողովի կազմակերպչական, փաստաթղթային, տեղեկատվական վերլուծական և մասնագիտական գործունեությունն ապահովվում է Երևանի քաղաքապետարանի աշխատակազմի աջակցությամբ:
35. Հանձնաժողովն իր կազմից կարող է ձևավորել աշխատանքային խմբեր՝ սահմանելով նրանց խնդիրները, գործունեության ժամկետները, կարգը՝ ընտրելով խմբերի ղեկավարներին: Աշխատանքային խմբերի գործունեությունը համակարգում է Հանձնաժողովի նախագահը:
36. Աշխատանքային խմբի կազմում կարող են ընդգրկվել նաև խմբակցություններից փորձագետներ: Աշխատանքային խումբն իր գործունեության արդյունքների մասին սահմանված ժամկետում զեկուցում է Հանձնաժողովի նիստում:
37. Աշխատանքային խումբը գործում է Հանձնաժողովի սահմանած ժամկետներում և կարող է լուծարվել վաղաժամկետ՝ Հանձնաժողովի որոշմամբ:

V. ՀԱՆՁՆԱԺՈՂՈՎԻ ՆԱԽԱԳԱՀԸ, ՆԱԽԱԳԱՀԻ ՏԵՂԱԿԱԸՆԸ, ԱՆԴԱՍԸ

38. Հանձնաժողովի նախագահը՝
 - 1) նախապառաստում և վարում է Հանձնաժողովի նիստերը.
 - 2) նախաձեռնում է Հանձնաժողովի արտահերթ նիստ.
 - 3) Հանձնաժողովին է ներկայացնում Հանձնաժողովի նիստի օրակարգի նախագիծը.
 - 4) ստորագրում է Հանձնաժողովի կարծիքը և (կամ) եզրակացությունը.
 - 5) ներկայացնում է Հանձնաժողովն այլ անձանց հետ հարաբերություններում.
 - 6) Հանձնաժողովի քննարկմանն է ներկայացնում ստացված դիմում-բողոքները և Հանձնաժողովի ընդունած որոշման համաձայն՝ ընթացք տալիս դրանց.
 - 7) համակարգում է Հանձնաժողովի աշխատանքները մյուս հանձնաժողովների և Երևանի քաղաքապետարանի աշխատակազմի հետ.
 - 8) համակարգում է աշխատանքային խմբի գործունեությունը.
 - 9) Իրականացնում է Հանձնաժողովի կանոնակարգով նախատեսված այլ լիազորություններ,
 - 10) Յուրաքանչյուր նստաշրջանի ավարտին Երևանի քաղաքապետին է ներկայացնում

տեղեկանք՝ նստաշրջանի ընթացքում Հանձնաժողովի նիստերից Հանձնաժողովի անդամների բացակայության մասին:

39. Հանձնաժողովի նախագահի տեղակալը

Հանձնաժողովի նախագահի բացակայության, նրա պաշտոնը թափուր լինելու դեպքում իրականացնում է Հանձնաժողովի նախագահի լիազորությունները:

40) Հանձնաժողովի նախագահի, նրա տեղակալի լիազորությունները դադարում են՝

- 1) Նրանց, որպես Ավագանու անդամի լիազորությունները դադարելու դեպքում,
- 2) Հանձնաժողովի նախագահի կամ տեղակալի պաշտոնում նրանց թեկնածությունն առաջադրած խմբակցությունից դուրս գալու դեպքում,
- 3) Նախագահի կամ տեղակալի պաշտոնից հրաժարվելու դեպքում:

41) Հանձնաժողովի նախագահը, նրա տեղակալը հրաժարականի մասին դիմումը ներկայացնում են իրենց խմբակցությանը: Խմբակցության ղեկավարն այդ մասին տեղեկացնում է Երևանի քաղաքապետին, ով էլ այն հրապարակում է Ավագանու առաջիկա նիստում:

42) Հանձնաժողովի նախագահի կամ նրա տեղակալի թափուր տեղերը համալրվում են կանոնակարգով սահմանված կարգով:

43) Հանձնաժողովի անդամն իրավունք ունի.

- 1) Հանձնաժողովի քննարկմանը ներկայացնել Հանձնաժողովի որոշման նախագծեր,
- 2) Հանձնաժողովի որոշմամբ՝ Ավագանու նիստերին ներկայացնել Հանձնաժողովի կարծիք և/կամ եզրակացությունը,
- 3) ունենալ ելույթներ, տալ հարցեր, հանդես գալ նախաձեռնություններով և կատարել առաջարկություններ Հանձնաժողովի, դրա աշխատանքային խմբերի նիստերում,
- 4) ընդգրկվել Հանձնաժողովի ստեղծած աշխատանքային խմբում,
- 5) իրականացնել Օրենքով, Կանոնակարգով, սույն կանոնակարգով եւ այլ իրավական ակտերով իր իրավասությանը վերապահված այլ լիազորություններ:

44. Հանձնաժողովի անդամը պարտավոր է.

- 1) մասնակցել Հանձնաժողովի աշխատանքներին, մասնավորապես՝ Հանձնաժողովի նիստերին, իսկ դրանց ներկայանալու անհնարինության դեպքում այդ մասին նախօրոք տեղյակ պահել Հանձնաժողովի նախագահին,
- 2) ուսումնասիրել Հանձնաժողով ներկայացված նախաձեռնությունների և որոշումների նախագծերը, առաջարկությունները, դիմում-բողոքները եւ տալ կարծիք:

37. ԵԶՐԱՓՈՒԿԻՉ ԴՐՈՒՅԹՆԵՐ

45. Սույն կանոնակարգն ուժի մեջ է մտնում Հանձնաժողովի կողմից հաստատվելու պահից:

46. Բոլոր այն հարցերը, որոնք չեն ներառվել սույն կանոնակարգում, կարգավորվում են Օրենքով և Կանոնակարգով:

47. Սույն կանոնակարգը հաստատվում, փոփոխվում և լրացվում է Հանձնաժողովի որոշմամբ:

Հանձնաժողովի նախագահ՝

Ս. Մկրտչյան